

FUNDAZIUN SCHMELZRA S-CHARL / MINIERS DA S-CHARL

Rapport annual 2022

da Peder Rauch, president

La radunanza generala ha gnü lö als 11 gün 2022 aint illa Baselgia da S-charl. 26 persunas eiran preschaintas. Il di davo la radunanza ha cumanzà la gestiun aint il Museum. Andrea Nesa Ziavras e Severin Koch han cumanzà lur lavur sco impiegats. In avuost ha Andrea Nesa stuvü partir per motivs da scolaziun e Renè Wäger ha lura surtut seis post. Renè es'eir respunsabel per la cumprita dals artichels dal Museum. Tuots han fat quista lavur per la prüma vouta e quai ha funcziunà fich bain.

Las entradas dal Museum s'han diminuidas in conqual cun l'on avant per fr. 4'671.80. Quai voul dir, invezza dad ün schmertsch da fr. 18'362.38 vaina gnü be fr. 13'690.59. Quista diminuaziun as manifestescha pro las entradas da persunas, pro las gitas e pro la cumprita da prodots aint illa butia. Da l'otra vart vaina gnü eir damain sortidas da pajas. L'on 2021 eiran quai 9'768.50 e l'on 2022 be 7'519.15. Quai voul dir fr. 2'249.35 da main.co l'on avant. Dürant l'on da corona vaina gnü ün schmertsch total da fr. 19'500--. Quist quint tanghescha però in prüma lingia il rendaquint da la Fundaziun Schmelzra S-charl chi maina il Museum. Da l'ontra vart esa eir interessant per nos commembers da la società da savair co cha'l Museum funcziuna.

Pro las gitas da Scuol Turissem vaina gnü 7 gitas cun scoulas da la Svizra bassa. La gita ordinaria dal marcurdi cun giasts individuals nun es statta frequentada uschè bain. Nus vain però listess manà 205 persunas aint illas minieras. Eir quist on vaina manà illas minieras üna gruppera da la Pro Junior cun uffants da la regiun. Scoulas da la regiun nu vaina praticamaing ingünas. I's stess ponderar soluziuns per svagliar l'interess. Allegraivel es, ch'üna gruppera da 30 persunas dal Vnost ans ha fat üna visita al Museum als 6 gün. Eir la Regenza dal chantun Turgovia ha giodü üna gita illas minieras ed üna guida tras S-charl. Quai de-muossa cha'l tema « Minieras » e l'istorgia da S-charl vain predschada.

Culla fabrica da las ruinas esa stat dürant ils ultims traís ons quietezza. Il motiv d'eira la pandemia e la mancanza da giarsuns. L'on 2'023 paress cha no vain darcheu furtüna da pudair retschaiver giarsuns da la Bassa. Uschè pudaina eir realisar nos progets e noss böts cha nus vain miss in vista.

Culs raps da la Società Miniers da S-charl, decis da nossa radunanza vaina pudü cumprar üna bella vaidrina pel Museum ingio cha no vain expost nossa collecziun da differentas glüms da miniers e da militar d'üna vouta. In quist lö vulessa ingrazcha a Vo tuots pel sustegn e per Vos interess vi da noss progets.

Ün giast fidel da S-charl chi vain da l'America a far vacanzas e visitescha mincha vouta nos Museum, s'ha lubi da far la traducziun in inglais da noss'exposiziun. Quai es duonna Se-quin Margareta da San Francisco, professura a la State University i'ls Stadis Units da l'America. Ella ha fat quai gratuitamaing ed eu vuless ingrazchar cordialmaing eir in nom da tuot la Società per quista gronda lavur e sporta.

Nus vain pudü ragiundscher üna cunvegna da prestaziun tanter il Chantun Grischun e la Fundaziun Schmelzra per üna contribuziun annuala da fr. 8'000--. A listess mumaint spord-schan eir ils cumüns da l'Energia Engiadina listess import fin l'on 2024. A las duos instituziuns ingrazcha da cour per quista decisiun.

Eir a nossa suprastanza ed als manaders e manadra dal Museum vulessa ingrazchar per Lur ingaschamaint. Eu sun fich cuntaint cun l'attività e la buna collavuraziun.